



Il suveran da Cuiria ha refusà omadus projects dal concept per novs implants da sport.

GRAFICA RTR

Naufragi per omadus projects

Votaziun en la citad da Cuiria

DA GION NUTEGN STGIER / ANR

■ **Ils votants e las votantas da Cuiria han refusà ils dus projects dal concept dals implants da sport Gesak. La summa d'investiziun per la nova halla da glatsch è vegnida refusada stgars, dentant ch'il project per ina halla da sport multifunziunala ha fatg cler naufragi.**

La votaziun pertutgant la planisaziun e l'investiziun en novas infrastructuras da sport en la chapitala grischuna ha sveglià l'interess dal suveran. 56% da las votantas e dals votants da Cuiria èn stads a votar la davosa fin d'emna. Quai saja bunamain ina participaziun da record, ha ditg *Urs Marti*, il president da la citad. Il project Gesak cumpigliava la realisaziun d'ina nova halla da glatsch e da ballape e per realisar quella quintava Cuiria cun investiziuns da stgars 37 milliuns francs. Il suveran ha refusà quel project cun 6616 vuschs tar 6311 vuschs. Damai be ina differenza da 305 vuschs. Ina differenza da tuttina 2479 vuschs hai lura dà tar il project da la halla da sport multifunziunala sco center naziunal per l'unihockey. Refusà ha il suveran quel project da radund 46 milliuns francs cun 7680 na tar 5201 gea. Urs Marti deplorescha cunzunt il resultat stgars tar il project da la halla da glatsch.

Votantas e votants sajan cun dir na ad omadus projects betg stads pronts en l'avegnir da pajar dapli taglia, ha ditg Urs Marti als meds da massa. Tar in gea tar quels dus projects avevan quels da Cuiria da pajar da nov 98% taglia empè da 90%.

Ulteriurs tschintg projects

Il project Gesak cumpigliava dentant anc tschintg ulteriurs projects. Tar quels ha la populaziun da Cuiria pudì exprimer sia opiniun en ina votaziun consultativa. Il suveran ha acceptà be quatter da quels tschintg projects cun ina summa totala d'investiziuns da passa 32 milliuns francs. Il project patinera Quader è vegnì acceptà cun 9366 gea tar 3536 na. Il resultat pertutgant il project bogn avert Sand cun in resultat dad 8286 gea tar 4558 na. Al project nov indrizs da tennis cun ina summa d'investiziun da stgars 9 milliuns francs ha il suveran da Cuiria ditg na e quai cun 5422 gea tar 7211 na. Il project halla da nudar mobila è vegnì acceptà cun 8094 vuschs persunter tar 4581 vuschs cunter. In gea dad 8932 vuschs tar 3852 vuschs hai er dà tar il project sanaziun dal bogn cuvert. Ultra da quai ha il suveran da Cuiria er decidì da remplazzar il cussegl da scola cun ina cumissiuun da furmaziun dad 8 persunas.